



Selasa, 28 Desember 2021
Ogen: Kuan-kuanen 23:4



Ola Susahi Bandu



Lit sada lagu Karo si nggo ndekah, judulna “Cangkul Cap Buaya”, si isina kira-kira sada morah-morah anak perana man keluarga “rondong”na si la setuju ia erteman erkiteken ia kalak si mesera. Lagu enda ncidahken maka lit denga jelma si jadi sukat-sukat atena jadi e me kebayaken. E maka bujur nge mbue kalak ersura-sura jadi kalak bayak. Salah kin jadi kalak bayak? Ntah salah kin ersura-sura jadi kalak bayak?

Raja Salomo ngataken “ola susahi dirindu ndarami kebayaken.” Si ipermasalahkan Raja Salomo i jenda labo soal payo ntah lang ndarami kebayaken. Sabap er-sen labo dosa, jadi kalak bayak labo dosa. Si jadi dosa e, e me adina jadi kalak bayak e me tujun geluhta, usaha kai pe ilakokenna gelah bayak ia, lanai Dibata si jadi pusat kegeluhenna. Dahikenlah dahinndu tempa-tempa kam erdahin guna Tuhan labo guna manusia, ertina manusia arusna erdahin guna mpesenangken Tuhan. Manusia ngusahai doni enda e me selaku bentuk tanggungjawabna man Tuhan si nggo masu-masu kegeluhenna.

Terlepas ntah dahinta mocok-mocok, aron ku juma, si mada juma, perbinaga, anggota dewan, pengusaha ekspor-impor, tugasta masing-masing e me uga kita ngaturken pasu-pasu Dibata si enggo sialoken e. Uga kita makeken pemereNa e guna mpehagaken gelarNa. Sabap jumlah sen e ntah pe kiniliten e asakai pe banci mpesenangken ukur Tuhan adina sidat alu cara si bujur, kita ngasup ngataken bujur ras njagai pusuhta tetap ermeteruk ukur. Jadi labo masalah jadi kalak bayak, erbintuas erdahin, beluh nimpan gelah bayak. Tapi, kebayaken e rehna bas Tuhan nari, ula bahan e jadi perayakenta nggeluh. Kalak si sen jadi sukat-sukat ras perayakenna, sia-sia me, sabap kerina e Dibata nge si merekensa.